

Is Ikezuwa He Surat Ni Epustul Pablo Ziyà Te Menge TigKurintu

Is Mehitenged te Ikezuwa he Surat he Para te Menge TigKurintu

Nekeuhang en human si Pablo te kegkesemuki te gehinawa zin mehitenged te menge tigKurintu he menge tumutuu. Subre en he sengetuig puun te kebpesurati zin kandan tenged te kegkeseeng din kandan dutun te kedluyahi te kedtuu zan wey te kegkengetebektebek dan. Iyan impekeuhang din su zutun te kebpekeuli ni Tito te midsugù din he ibpehendiyà te Kurintu netudtul zin he mahabet kandan is mid-iniyug en te menge salè dan wey meupiyè en daan is gehinawa zan ki Pablo.

Iyan, kemulu pa zuen duma kandan he kenà egkilala te kegkeepustul ni Pablo su kenè kun sikandin iring duen te zuma he nemekeuma ziyà te kandan he nemenurù kandan. Ne kayi te ikezuwa he surat din kandan midtavak din sikandan te utew en dekelà is menge kemeregenan he naantus din te kedsangyew ziyà te kandan wey ziyà te zuma te Meupiya he Tudtulanen, wey nenigis is menge luhè din tenged te kebmahala zin kandan.

Piru haazà is nenurù kandan he iyan edsunuzen dan, iyan dà baal zan is kebpegalbu wey kebpenurù te menge penurù he mibèbeelan dà te etew.

Ne elin daan migkagi ni Pablo ziyà te kandan is: kinahanglan he leusa zan is baal zan te kedtigum te tavang he para te edlilised he menge tumutuu ziyà te Hiruselim. Su zekelà is azen dan tenged te kedtuvazi kandan te Megbevayà ne ebpekehimu sikandan he edtavang te ereg he edtevangan.

Ne mezakel zaan is impenurù ni Pablo kandan he mehitenged te kebpenilbi te Megbevayà, ke sikandin te, “Is etew he ebpenilbi te Megbevayà, ne iring sikandin te ziniyun he midteguan te utew mahal, su insarig kandin te Megbevayà is mahal he lalag din mehitenged ki Jesu Kristu.”

1 ¹ Siak si Pablo. Migeraran a he epustul ni Jesu Kristu tenged te iyan egkesuatan te Megbevayà. Siak wey si Timoteo he suled tew, ebpesuratan dey sikiyu is langun he menge tumutuu te Megbevayà diyan

te inged he Kurintu wey is langun daan he menge etew he negaked te Megbevayà seled te tivuuk he prubinsya he Gerisya.

²Berakat he ikegagew kew te Amey tew he Megbevayà wey te Nengazen tew he si Jesu Kristu ne tuvazi kew zan te melinawen he kebpekesavuk.

Is Kedasig te Megbevayà

³Edeligen tew is Megbevayà he iyan Amey te Nengazen tew he si Jesu Kristu; iyan sikandin hihizuwen he Amey tew wey puunà te minsan hengkey he tavang kenitew. ⁴Edtevangen kiw zin te langun he menge seeng tew ne tenged kayi ebpeketavang kiw zaan te zuma he etew he zuen din minsan hengkey he seeng. Is idtavang tew kayi, ne iyan ded is intavang kenitew te Megbevayà. ⁵Minsan pa te zekelà is kemeresayan he egkeantus tew tenged te nekidsevaha kiw ki Kristu, dekelà daan is tavang kenitew te Megbevayà tenged daan ki Kristu. ⁶Emun idtugut te Megbevayà he mekeantus key te merasey, umba ibpaantus key zin su wey kew mezeyzey ne wey kew zaan mevegayi te untung he wazà pidteman. Ne iring din ded daan emun edtevangen key te Megbevayà ne egkehimu heini he tavang din daan keniyu. Ne pinaagi kayi edlig-enan din is kedtuu niw wey niw zaan maantus is merasey he iring te ibpaantus kenami. ⁷Umba kenà duwazuwa is kedsarig dey keniyu su netuenan dey he emun ed-entusen niw is merasey he iring te naantus dey zaan, ne iring din ded daan, edtevangen kew te Megbevayà iring te edtevangen key zin daan.

⁸Su egkesuatan dey, menge suled, he metueni niw is dekelà he samuk dey hein diyè key te prubinsya he Asya. Utew merasey is penggezam kenami he kenè dey pezem egkeantus umba kunaan dey ke ibpatey zey. ⁹Henduen be te iyan en haazà ketepusan te untung dey, iyan, umba nehitavù heini zini te kenami su wey key kenà mekesarig te kenami zà he ketau, kekenà, wey key mekesarig te Megbevayà he iyan ebpemanhew te menge minatey. ¹⁰Ne midtevangen key te Megbevayà ne midlig-enan key zin, umba nelibri key ne wazè key mehimetayi. Ne netuenan dey he ebpenigudu sikandin he edtavang kenami. Dekelà is kedsarig dey he kenè key zin ed-engkezan te edtavang. ¹¹Ne kinahanglan he edtevangen key zaan keniyu pinaagi te ked-ampù. Ne human egkehimu he mezakel is ebpeselamat te Megbevayà tenged te gagew zin kenami tenged te ked-ampù te mezakel he menge etew.

Is Kebisita Pezem ni Pablo

¹²Duen, menge suled, idantal zey ne netuenan dey he tutuu heini, ne iyan is: layun meupiya is ulaula zey ziyà te minsan hentei he etew, lavew en diyan te keniyu. Su layun key edtuman te egkesuatan te

Megbevayà ne utew hustu is tuyù dey. Wazè dey gemita is ketau zey te etew zà duen, kekenà, iyan igkehimuwa zey te langun is mekegegehem he tavang te Megbevayà. ¹³Iyan dey zà idtagù te surat emun ebpeuwitan dey sikiyu te surat is egkevasa niw wey egkesavut niw. Ne egkesuatan ku he egkepurung niw egkesavut ¹⁴haazà is wazè niw pa maamin mesavut mehitenged te ed-ul-ulahan dey su wey zutun te andew te kedlikù te Nengazen tew he si Jesus, mehimu he igkelihey key keniyu iring te igkelihey zey zaan sikiyu.

¹⁵Ne geina te netuenan ku he siguradu nesavut niw en heini, neisip ku he edhuna a ebpenumbaley ziyàn te keniyu su wey kezezuwa ku sikiyu metevangi ¹⁶su iyan pezem dini te isip ku is: edtuluy a ziyàn ke edhendiyà a te Mesidunya ne emun ed-uli a ne edtuluy e zed maan diyan te keniyu su wey a zaan metevangi keniyu zutun te kedhendiyè ku te prubinsya he Hudiya. ¹⁷Ne geina te wazè ku heini metuman kunaan niw vuwa ke layun edhalinhalin is isip ku. Kunaan niw vuwa zaan ke iring is menge isip ku te isip te etew he iyan ebayàbayà kandin is kandin dà he mezaat he suat. Kunaan niw ke zutun te kegkagi ku he ebpehendiyàn a ne iyan bes neseled dini te gehinawa ku is kenà a ebpehendiyàn. ¹⁸Emun tutuu is egkegiyen te Megbevayà, ne tutuu zaan heini is egkegiyen ku. Su is neseled diyà te gehinawa ku ne kinahanglan he edtumanen ku. ¹⁹Sikami engki Silas wey si Timoteo, impenudtul zey ziyàn te keniyu kes Anak te Megbevayà he iyan si Jesu Kristu. Ne netuenan niw he metinumanen sikandin te lalag din ne kenà egkehimu he kenè din edtumanen is penaad din. ²⁰Su pinaagi kandin edtumanen is langun he menge penaad te Megbevayà. Ne tenged kayi ebpekekagi kiw he venar iyan he metinumanen sikandin ne tenged kayi egkezalig is Megbevayà. ²¹Su is Megbevayà, ne iyan edheget te kedtuu tew ki Jesu Kristu ne iyan sikandin mibpili kenitew ²²ne mibegayan kiw zin te gehem he tuus he menge gaked kiw zin, ne midhimu zin he ulini kiw te Wagas he Mulin-ulin he iyan tuus he edtumanen din is minsan hengkey he penaad din kenitew.

²³Siluti a te Megbevayà emun kenà tutuu is egkegiyen ku. Netuenan din he iyan ketezengan ke maan is wazà a mekepenumbaley ziyàn te Kurintu su wey kenè kew meseeng pinaagi te kedsusiya ku te menge ulaula niw. ²⁴Kenè dey egkesuatan he ebayàbayè key ke hengkey is edtuuwan niw su netuenan dey he meheget en is kedtuu niw. Egkesuatan dey zà he mehimu key he timbang niw te ebpeveelan kenitew te Megbevayà su wey kew melihey.

2 ¹Ne tenged kayi, menge suled, neisip ku he kenà ad ed-uman ebpenumbaley ziyàn emun iring ded dutun te nehuna he kedhendiyàn ku, su zutun ingkeseeng niw is kebpenumbaley ku. ²Su emun igkeseeng a keniyu ne hentei is edlihey kedi? Wazà, su egkeseeng

kew man kediey. ³Umba, minge suled, iyan mibeelan ku zutun is mibpeuwitan ku zà sikiyu te surat. Su kenè ku zutun egkesuatan he ebpenumbaley a ziyàn su netuenan ku he sikiyu is minge etew he kinahanglan pezem he iyan igkelipey ku, ne igkeseeng ku zutun. Ne netuenan ku zaan he emun egkelipey a, egkelipey kew zaan. ⁴Dutun te kebpeuwiti ku keniyu te surat, utew ad neseeng. Mibmesakit is gehinawa ku ne mibpenigis is luhè ku. Iyan, kenè ku pezem dutun tuyù is wey kew meseeng, kekenà, egkesuatan ku he metueni niw he utew kew mahal zini te gehinawa ku.

Is Kebpesaylu Zuen te Nekesalà

⁵Ne haazà is etew he nekesalà diyan, kenà a iyan neselaan din, kekenà, iyan kew, ne emun kenà, ne iyan is duma keniyu. Kenè ku egkesuatan he utew mesekiti is gehinawa zin pinaagi te minge lalag ku. ⁶Netengkaan en, minge suled, is kedsiluti niw kandin. ⁷Ne guntaan kinahanglan he peseyluwa niw sikandin. Sembagi niw su kela ke maawà is kedsarig din te Megbevayà te utew subra he kegkeseeng din. ⁸Edhengyuen ku keniyu he ipeehe niw kandin he tutuu iyan is gagew niw kandin. ⁹Umba mibpeuwitan ku sikiyu te surat ku su wey ku maahà ke metinumanen kew ve te langun he minge sugù ku. ¹⁰Ne ke zuen etew he ebpeseyluwen niw, ebpeseyluwen ku zaan. Su penenglitan ke zuen nekesalà diyan wey ebpeseyluwen ku, netuenan ni Kristu he iyan ketezengan ke maan is ebpeseyluwen ku su wey mebmelinew is kedezepitè niw. ¹¹Ne umba ed-ul-ulahan ku heini su wey kenè kiw meekali ni Setanas. Netuenan tew ke hengkey is mezaat he edhimuwen din pezem dini te kenitew.

Is Ingkesemuki ni Pablo Ziyà te Truwas

¹²Minge suled, hein midhendiyà a te inged he Truwas te kedsangyew te Meupiya he Tudtulanen, neehè ku he midhimu en te Nengazen is paagi wey ku ikepelaus is ebpevelan din kedì. ¹³Iyan, utew zutun nesemuki is gehinawa ku su kenè ku egketuredu is suled tew he si Tito. Ne tenged kayi, mid-ewaan ku is minge tumutuu he meginged dutun ne midlaus a ziyà te prubinsya he Mesidunya.

Is Kebpekeeneb te Meupiya he Tudtulanen

¹⁴Ne minsan pa zutun utew zekelà is kebpeelemati ku te Megbevayà su tenged te kebpekidsevaha tew ki Kristu, iring kiw te minge vihag ni Kristu he ibpeehe din diyà te minsan hentei. Ne pinaagi kenitew ibpesavut din diyà te minge etew ke hentei sikandin diyà te minsan hendei. ¹⁵Ne geina te nehimu key he minge sugù ni Kristu, iring key te veyawà he ibegey ni Kristu ziyà te Megbevayà. Is ngazeg kayi, ne ziyà mekeeneb te minge etew he egkelibri te silut wey ziyà daan te kenà

egkengelibri. ¹⁶Ne haazà is minge etew he kenà ebpelelibri, is ibpesavut dey kandan ne henduen be te utew memahù su nesavut dan he neangken dan en is kemetayen. Ne haazà mulà is minge etew he ebpelelibri ki Kristu, is ibpesavut dey kandan, ne henduen be te utew mehemut su nesavut dan he neangken dan en is untung he wazà pidtemanan. Hentei vuwa is dait te kedsengyawa kayi te tudtul?

¹⁷Iyan, sikami, kenè dey ed-iringan is ulaula te mezakel he ebpenurù su ziyà te kandan henduen be te ibpenapì dan is Lalag te Megbevayà. Ne tenged te midsugù key te Megbevayà, ne tenged daan te edsusiyen key layun te Megbevayà, tutuu is tuyù dey wey egkegiyen dey su nekidsevaha key ki Kristu.

Is Begu he Paagi

3 ¹Kunaan niw vuwa ke idantal zey en maan heini. Kenè key iring te zuma he ebpenurù su kenè niw sikandan egkezawat emun wazà surat he igkepeehè dan he ibpesavut dutun he wazà mezaat he ulaula zan. Ne iring din ded daan kenà sikandan egkezawat te zuma he etew emun wazè dan surat he iring dutun he ziyan ebpuun te keniyu. ²Sikami mulà, kenè key egkinahanglan te iring dutun. Netuenan dey he iyan kew surat dey su pinaagi te ulaula niw he meupiya egketuenan te minsan hentei he meupiya zaan is kenami he ulaula. ³Su iring is kedtuu niw te surat he ibpesavut dutun he hustu is ulaula zey. Ne iyan mibaal kayi te surat si Kristu su midsugù key zin diyan wey kew meketuu. Ne zeyzey heini is surat su wazà isurat pinaagi te kintà ne wazà daan isurat diyà te minge edsuratan he watu iring te kesuguan he imbilinbilin ni Moises, kekenà, pinaagi te Wagas he Mulin-ulin insurat te Megbevayà diyà te gehinawa niw te minge etew.

⁴Umba egkekagi zey he iyan kew surat dey su pinaagi te kebpekidsevaha zey ki Kristu dekelà is kedsarig dey te Megbevayà. ⁵Kenè dey egkekagi he pinaagi te kenami he ketau egkehimu zey is minsan hengkey, kekenà, netuenan dey he ziyà ebpuun te Megbevayà is kegkehimuwa zey te langun. ⁶Su iyan sikandin ebegey kenami te ketau wey zey ikepenurù is begu he paagi he midtukud din te kebpekidsevaha zin te menusiyà. Ne wazà heini is begu he paagi ivegey pinaagi te insurat he kesuguan, kekenà, imbegey zin heini kenitew pinaagi te Wagas he Mulin-ulin. Su emun iyan ta edserigan is kedtumana ta te kesuguan, ne kemetayen he wazà pidtemanan is ebperetengen ta. Iyan, ke ibegey kenitew is Wagas he Mulin-ulin ne untung he wazà pidtemanan is ebperetengen ta.

⁷Dutun te kedsurata zengan te Megbevayà te kesuguan, duen te minge edsuratan he watu, neselikuvungan si Moises te ed-anlag he gehem te Megbevayà. Ne zutun nenganlag is paras ni Moises tenged te gehem

te Megbevayà ne nekesirang te minge etew he kevuwazan ni Israyil. Ne minsan pa zutun te utew merayag haazà, naawà gihapun haazà is gehem. Iyan ibpesavut kenita pinaagi te kesuguan is: ebpatay is gimukud te menusiya. Ne minsan pa zutun utew zekelà is gehem he impaahà te Megbevayà dutun te kedsurata zin kayi. ⁸Emun dekelà is gehem he impaahà dutun te kebegaya zin te kesuguan, iyan pe be kenà tuwas pa he mekegegehem is kebegaya zin te Wagas he Mulin-ulin. ⁹Emun dekelà is gehem te kesuguan he iyan idsiluti te menusiya, iyan pe be kenà dekelà pa utew is gehem te paagi he iyan ebpekehimu he mebmetazeng is menusiya. ¹⁰Ne haazà is kesuguan he zekelà dengan is gehem din, nehimu en guntaan he wazè din gehem su mid-ilisan en te vegu he paagi he utew pa zekelà is gehem. ¹¹Su ke zuen gehem te zaan wey naawè en haazà is daan he zuen din gehem, iyan pe be kenà dekelè pa utew is gehem te vegu he kenà mulà egkeawà.

¹²Ne geina te ebpekesarig key he kenà heini egkeawà te minsan keenu kenè key egkehandek te kedsengyawa zey te Lalag te Megbevayà. ¹³Ne kenè key iring ki Moises su wazè dey id-eles. Su si Moises, mid-elasan din is buked din wey kenà maahà te minge zuma zin he kevuwazan ni Israyil kes ed-anlag he gehem he egkenaney en egkeawà. ¹⁴Su zutun neelangan daan is minge kedsavut dan. Ne wazà daan mahalín heini guntaan su kemulu pa neelangan is kedsavut te minge Hudiyu. Ne emun ebasa zan mehitenged te zaan he paagi kenè dan egkesavut. Ne emun duen kandan edtuu ki Kristu, id-awà te Megbevayà is ebpekealang te isip din ne human sikandin ebpekesavut. ¹⁵Ne kemulu pa guntaan is kenè dan kebpekesavut su emun ebesahan te minge Hudiyu is kesuguan he imbilinbilin ni Moises, kenè dan egkesavut su neelangan pa is isip dan. ¹⁶Iyan, id-awà is ebpekealang te kedsavut te etew emun edtuuwan din is Nengazen. ¹⁷Ne heini is egkegiyen he Nengazen, ne iyan kes Wagas he Mulin-ulin, ne emun ed-ulinan is etew te Wagas he Mulin-ulin nevelukasan en sikandin te kegkeuripena kandin te kesuguan. ¹⁸Ne, minge suled, sikitew is langun, nesavut tew en he utew lavew is gehem te Nengazen tew, ne wazà ebpekealang te kedsevuta tew kayi. Ne pinaagi kayi te gehem he ebpuun te Nengazen he iyan kes Wagas he Mulin-ulin, edhimuwen kiw zin he iring te kandin ne layun ed-iseg heini is gehem.

4 ¹Nehizuwan key te Megbevayà ne midtezù key zin wey zey metuman is ebpevelan din kenami mehitenged te kedsengyawa te vegu he paagi ne tenged dutun kenà egkeawà is gustu zey te kedtumana kayi. ²Sikan is minge mahawag he ulaula he meeles he ebeelan te zuma, kenè dey mulà ebeelan. Kenè key edtarùtarù ne kenè dey edhelinen is Lalag te Megbevayà, kekenà, hustu is kedsengyawa zey su wey mesavut te minsan hentei he kenà tarù is ebeelan dey. Iyan edsusi kayi is Megbevayà. ³Ne is Meupiya he Tudtulanen he ibpesavut dey, emun

in-eles heini, iyan dà neelesan kayi is menge etew he kenà edawat te untung he wazè din pidtemanan. ⁴Kenè dan edtuu su mid-elangan is isip dan ni Setanas he iyan ed-ezapan te menge etew kayi te kelibutan. Tenged kayi kenà egketeyawan is isip dan te Meupiya he Tudtulanen mehitenged te utew kegkelavew ni Kristu. Pinaagi ki Kristu egkesayud ki ke hentei is Megbevayà su iyan sikandin dagwey te Megbevayà. ⁵Kenà iyan dey ibpenurù su wey key mevantug te menge etew, kekenà, iyan dey ibpenurù su wey mevantug si Jesu Kristu he iyan Nengazen te langun. Sikami, edtevangen dey en sikiyu su wey zey metuman is sugù ni Jesus. ⁶Su zutun te kedlimbaga te Megbevayà te langun migkagi sikandin te, “Maawà is kersireman ne mehimu is kerayag.” Ne iyan daan sikandin kes midtayew te isip dey su wey zey mesavut ke hengkey is gehem te Megbevayà he impezayag pinaagi ki Jesu Kristu.

Is Keluya ni Pablo

⁷Ne sikami, iring key zà te kuzen he ziniyun he neteguan te utew mahal. Ne pinaagi kayi egkesavut te menge etew he is utew zekelà he gehem he egemiten dey te utew meguyà is lawa, ne in-ulin kenami te Megbevayà ne kenà dini ebpuun te kenami. ⁸Layun key ebpekeagi te kemeregenan, iyan, kenà egkeawà is kedsarig dey. Henduen be te wazè dey en layun paagi, iyan, edsarig key gihapun te tavang te Megbevayà. ⁹Ebpesipelahan key te menge kuntada zey, iyan, kenè key ed-ewaan te Megbevayà. Mibugel key te menge kuntada zey, iyan, wazè key zan mepatey. ¹⁰Iring ki Jesus dengan, egkuntedahan key layun te menge etew, ne egkesuatan key zan te edhimatey. Umba egkeaula heini is langun su wey metueni pinaagi kenami he uuyag en maan si Jesus su layun key zin edtevangen. ¹¹Su minsan keenu he timpu kenà egkeawà dini te kenami is kebpemiligru zey te menge etew he egkesuat he edhimatey kenami tenged te kedsengyawa zey te ngazan ni Jesus. Umba egkeaula zini te kenami heini su wey metueni he uuyag en maan si Jesus su layun key zin edtevangen su wey key kenà mehimetayi. ¹²Umba kenà egkeawà dini te kenami is kebpemiligru zey te kemetayen su edsangyew key te Meupiya he Tudtulanen, iyan, maambe en su pinaagi kayi egkehimu ziyen te keniyu is untung he wazè din pidtemanan.

¹³Duen ingkesurat he lalag te etew he edhenduen te, “Midtuu a te Megbevayà ne ebpenudtulen ku is impeketuu ku.” Ne iring ded dutun heini is ed-ul-olahan dey su tenged te kedtuu zey te Megbevayà ibpesavut dey is impeketuu zey. ¹⁴Su netueanan dey he is Megbevayà he mibanhew te Nengazen tew he si Jesus, ebhawan key zin daan keuzemà tenged te kebpکیدsevaha zey ki Jesus ne edtulusen key zin wey key meketampu keniyu ne egkehimu kiw pudu he menge zuma zin diyà te langit. ¹⁵Ne umba ed-entusen dey is langun he meregen su wey kew iyan mezeyzey,

su emun egketukid en is mezakel he etew te gagew te Megbevayà, ne zutun ed-iseg he ebmezakel is ebpekeselamat te Megbevayà ne egkevantug is Megbevayà.

¹⁶Ne tenged kayi kenà egkeawà is pulus te kedhagù dey. Kada andew ne ed-iseg is kebmegurang wey kebmeguyà te lawa zey. Ne minsan pa zutun kada andew zaan ne ibpeiseg te Megbevayà is kedlig-eni zin te kedtuu zey. ¹⁷Ne heini is menge kemeresayan he egkeantus dey guntaan, ne megaan dà utew, iyan, tenged te ked-antus dey kayi zuen egkeperateng dey he utew zekelà he kekgelavew he ibegey kenitew keuzemà. Ne kenà ebpekesusuluwan is kemeresayan he egkeantus dey kayi te utew zekelà he wazè din pidtemanan he kekgelavew. ¹⁸Su iyan netagù mepurung dini te gehinawa zey, kenà is menge vutang he egkeehè ta zini te kelibutan, kekenà, iyan is menge vutang he kenè te pa egkeahà he ziyà te langit. Su is menge vutang he egkeehè ta zini te kelibutan, ne megaan dà egkehanew, iyan, sikan is kenè pa egkeahà he ibegey te Megbevayà, ne kenà mulà egkehanew te wazà pidtemanan.

Is Ilengiten he Lawa Tew

5 ¹Is lawa ta, ne iring te valey he egkeubpaan ta. Ne netuenan ta he ke egkerundus heini is baley, duen baley he egkeubpaan ta ziyà te langit *he iyan is begu he lawa he ibegey te Megbevayà. Kandin he vaal heini ne wazè din pidtemanan.* ²Ne geina te utew ki edlised te zini ki pa te kelibutan, utew ta igkesuat he ivegey en pezem kenita haazà is begu he lawa ta he ziyà te langit. ³Su zutun te kebenhawa kenita keuzemà, kinahanglan he zuen lawa ta. ⁴Su sikita is tumutuu he uuyag pa zini te kelibutan, edlised ki su nevegatan ki kayi te menge kemeregenan he egkeantus kayi te kelibutanen he lawa ta, asal kenè ta iyan egkesuatan he meewai ta heini is lawa ta, kekenà, iyan egkesuatan ta is wey mevegayi ki en pezem guntaan dutun te vegu he lawa he ebpuun diyà te langit, ne zutun egkeilisan is lawa he zuen din kemetayen te lawa he zuen din untung he wazà pidtemanan. ⁵Is Megbevayà, daan ki zin he mid-andam su wey meulaula heini kenita keuzemà, ne mibegayan ki zin daan te Wagas he Mulin-ulin he iyan tuus he edtumanen din heini.

⁶Tenged dutun, layun meheget is kedsarig dey te Nengazen. Netuenan ta he te kemulu ki pa kayi te kelibutanen he lawa, kenè ki pa ziyà te ed-ubpaan te Nengazen. ⁷Su ibpeikul ta is ibayè ta zini te kelibutan pinaagi te kedsarig dà te Megbevayà su kenè te pa egkeahà is edungguan ta ziyà te langit. ⁸Layun mezesen is kedsarig ta te Nengazen ne egkesuatan ta pezem he meewai ta heini is kelibutanen he lawa su wey ki mekeulì diyà te Nengazen. ⁹Iyan, ke minsan hendei ki, ke zini ki te kelibutan wey ke ziyè ki ve te ed-ubpaan te Megbevayà, iyan utew ta egkesuati is kedtumana ta te egkesuatan te Megbevayà. ¹⁰Su is minsan

hentei kenitew, kinahanglan he ziyà ed-etuvang keuzemà te ki Kristu su edsusiyen din is minge ulaula tew su wey mezawat te kada sevaha kenitew is suhul he zait te langun he mid-ulaula zin dini te kelibutan ke meupiya ve wey ke wazè din minge pulus.

Is Kedepitè Tew Ziyà te Megbevayà

¹¹Ne geina te netuenan dey he utew mekehandekhandek keuzemà haazà is kedsusiya te Nengazen te minge ulaula te menusiya, edhimuwen dey pezem is taman te egkehimu zey wey meketuu is minge etew. Netuenan te Megbevayà he kenà mezaat is tuyù dey, ne egkesuatan ku he metueni niw zaan heini. ¹²Heini is minge lalag ku, kenà iyan tuyù ku kayi is wey key keniya mezelligi, kekenà, egkesuatan dey he metueni niw he hustu is tuyù dey su wey zuen ketezengan he igketavak niw zutun te minge etew he iyan dan ed-ahaan is paras te etew ne kenà is meupiya he ulaula zin. ¹³Kunaan te zuma ke ebunegen key, iyan, umba henduen key te ebunegen su utew mezesen is kedtumana zey te ebpeveelan te Megbevayà. Iyan, ke ed-isipen niw he kenè key ebunegen, netuenan niw he iyan ipbenigudu zey su wey kew mezeyzey. ¹⁴Ne umba edhagù key su netuenan dey he mahal key ziyà te gehinawa ni Kristu. Netuenan dey he midhimetayan sikandin is sebsevaha he elili te tivuuk he menusiya ne tenged kayi henduen be te pudu en nekeagi te kemetayen is tivuuk he menusiya. ¹⁵Minatey sikandin he elili te tivuuk he menusiya su wey sikandan is minge etew he uuyag pa, kenè dan en maan med-ulaula te kandan he egkesuatan, kekenà, med-tuman dan en te egkesuatan ni Kristu he iyan midhimetayan wey nevanhew su wey melibri sikandan te silut.

¹⁶Is paagi zey te ked-isipa te minsan hentei he etew, ne kenà iyan is paagi he egemiten te minge etew he wazà medtuu. Dengan, iyan heini migamit dey he paagi su mid-isip dey he etew zà duen si Kristu, iyan, guntaan netuenan dey he kenà etew zà duen sikandin. ¹⁷Ne sikan is etew he nekidsevaha en ki Kristu, begu en sikandin he linimbag. Nahanew en diyà te kandin is daan he netagù te isip din ne mid-ilisan en heini te vegu. ¹⁸Iyan midhimu kayi is Megbevayà su pinaagi ki Kristu midhimu kiw zin he minge emigu zin. Ne mibpeveelan din daan kenami is kedhimuwa te zuma he etew he meemigu zin. ¹⁹Iyan ipesavut dey is: pinaagi ki Kristu egkehimu he edhimuwen te Megbevayà is tivuuk he menusiya he minge emigu zin. Ne id-awè din diyà te isip din is minge mezaat he ulaula zan. Ne sikami, insarig din kenami is kedtudtula he egkehimu en he ebpekid-emigu te Megbevayà is menusiya.

²⁰Umba midsugù key ni Kristu su wey pinaagi kenami ebpekehangyù keniya is Megbevayà. Ne tenged ki Kristu edhengyuan dey zaan sikiyu he itugut niw he himuwa kew te Megbevayà he minge emigu zin.

21 Wazà minsan hengkey he mezaat he ulaula ni Kristu, iyan, midhimu te Megbevayà he iyan sikandin midsilutan tenged te salè tew su wey pinaagi te kebpekidsevaha tew kandin, egkehimu he ed-isipen kiw he metazeng te Megbevayà.

6 ¹Ne geina te nehimu key en he minge timbang te Megbevayà, edhengyuan dey sikiyu he himuwa niw he mebpulus is gagew zin keniyu. ²Su zuen insurat he Lalag te Megbevayà he edhenduen te, “Dutun te timpu he egkesuatan ku, mibpeming a te ked-ampù nu; ne zutun te hustu he timpu te kedlibriya ku te menusiya, midtevang an ku sikew.”

Ne iyan lalag ku keniyu is: iyan en heini timpu he egkesuatan te Megbevayà te kedtavang keniyu; iyan en heini timpu te kedlibriya zin keniyu te silut.

Is Kebpekesavuk ni Pablo

³Egkesuatan dey he wazà igkesawey te minsan hentei te ulaula zey su wey wazà igkesudi dan te kedsengyawa zey te Lalag te Megbevayà. ⁴Ne umba ebpurungan dey is ulaula zey su wey zey ikepaahà he minge suluguen key te Megbevayà te minsan hengkey he paagi. Ne tenged kayi ed-antus key te minsan hengkey he kemeregenan, kemeresayan, wey minge samuk. ⁵Mibugel key, mibpirisu key, mibpesipelahan key te edsinamuk. Duen timpu he utew subra is terebahu zey ne nepurang key ne nevitil key zaan. ⁶Ne midlikayan dey is meremerik he ulaula. Hustu is kedsevuta zey te Lalag te Megbevayà; mepeseyluwen key ne metinevangen key te minsan hentei. Ed-ulinan key te Wagas he Mulin-ulin; ibpeehè dey is gagew zey ziyà te langun; ⁷ibpenurù dey is tutuu he Lalag te Megbevayà ne edtevangen key te gehem te Megbevayà. Pinaagi kayi te langun egketuasan he minge suluguen key te Megbevayà. Iyan kelasag dey wey lembitan dey is metazeng he ulaula. ⁸Duen edtahud kenami ne zuen daan minge etew he kenè key zan edtehuzen. Duen edalig kenami ne zuen daan ed-ituk kenami. Duen egkagi he teruen key, iyan, kenà tarù is egkegiyen dey. ⁹Duen egkagi he utew minus is pid-etawan dey, iyan, nasì dekelà is bentugan dey. Layun key ed-ed-edisi te kemetayan, iyan, idtugut pa te Megbevayà he kenè key pa mebpatey. Edsilutan key te Megbevayà wey key mepenurù, iyan, kenè key zin edhimetayan. ¹⁰Mezakel is minge seeng dey, iyan, layun key egkelipey. Henduen be te utew key egkeayuayu, iyan, pinaagi kenami, edsepian te wazà pidtemanisan is mezakel he minge etew. Henduen be te wazè dey azen, iyan, naangkan dey is langun he ibegey te Megbevayà.

¹¹Sikiyu is minge suled ku ziyen te Kurintu, wazè dey ieles keniyu is isip dey. Layun kew mahal zini te gehinawa zey. ¹²Kenè iyan minus is

gehinawa zey keniyu, kekenà, iyan kew minus is gehinawa niw kenami.
 13Edlelagan ku en sikiyu he iring te minge anak ku. Kinahanglan he mahala key zaan diyan te gehinawa niw.

Is Kenà Kebpeked-amur te Meupiya wey Mezaat

14Kenè kew, minge suled, mebpekidsevaha te minge etew he kenà tumutuu su kenà egkehimu he egkesevaha is meupiya wey mezaat. Ne kenà daan egkehimu he ebpeked-amur is kerayag wey is merusirem.
 15Kenà daan egkeuyun si Kristu wey si Setanas ne kenà egkehimu he egkesevaha is tumutuu wey is kenà edtuu. 16Ne is simbahan he Valey te Megbevayà he zutun ed-ezapa sikandin, kenà egkehimu he zutun daan ed-ezapa is minge tarù he ed-ezapan. Ne iring din ded daan sikitew is tumutuu su iyan kiw iring te valey he ed-ubpaan te wazè din kemetayen he Megbevayà. Su migkagi is Megbevayà te,

“Edlumunan ku sikandan
 ne ebpekiduma a kandan
 ne egkehimu he iyan a edsimbahan dan he Megbevayà
 ne iyan sikandan minge gaked ku he etew.”

17Ne tenged kayi migkagi zaan is Megbevayà te,
 “Suwayi niw is ebpemen-azap
 te kenà tutuu he ed-ezapan
 ne sivey kew kandan.
 Engkezi niw is minsan hengkey he
 meremerik he ulaula ne edewaten ku sikiyu.

18 Ne egkehimu a he Amey niw ne sikiyu,
 minge vahi wey maama,
 egkehimu kew he minge anak ku.
 Lalag heini te mekegegehèm he Nengazen te langun.”

7 1Ne geina te iyan heini impenaad kenita te Megbevayà, ne edlumpiyuwen ta is minge ulaula ta su wey wazà minsan hengkey he meremerik he ulaula te lawa ta wey meremerik he isip ta. Ne ebpurangan ta is ulaula ta su wey mehegeti is kebmetazeng ta pinaagi te layun ta kedtehuza kandin.

Is Ked-engkezi te Minge Tumutuu te Mezaat he Ulaula

2Mahala key keniyu ziyàn te gehinawa niw su wazè dey salà te minsan hentei ziyàn; wazà minsan hentei ziyàn he nezeetan dey is kedtuu zin. Wazà minsan hentei ziyàn he midlimbungan dey. 3Kenà iyan igkegiya ku kayi su zuen igkesewayi ku keniyu. Nekagi ku he zaan he utew kew mahal zini te gehinawa zey. Te uuyag key pa wey minsan ke ebpatey key en ne kenè kew gihapun egkeawà dini te gehinawa zey. 4Utew zekelà is kedsarig ku keniyu; dekelà layun is kebpekezalig ku keniyu. Ne tenged

kayi minsan pa te mezakel is minge seeng dey, meupiya gihapun is gehinawa ku; utew zekelà is kelipey ku tenged keniyu.

⁵Ne hein nekeuma key en dini te prubinsya he Mesidunya, wazè key gihapun meewai te minge seeng dey. Su neregenan key te mezakel he samuk. Mibpekidebek kenami is minge kuntada zey ne ingkeipeng dey is minge tumutuu. ⁶Iyan, is Megbevayà he metau he edlipey te egkengeseeng, midhimu zin he meupiya is gehinawa zey pinaagi te kebpekeuma ni Tito. ⁷Ne kenà iyan dà ingkelipey zey is kegalew zey ki Tito, kekenà, elin daan is tudtul zin he utew sikandin nelipey mehitenged keniyu. Netudtul zin he egkesuatan niw utew he mekopenumbaley a ziyàn. Netudtul zin daan he ebuyù kew te pesaylu zini te kediey. Ne elin daan tudtul zin is: dekelà te gehinawa niw is kedtumana niw te egkesuatan ku. Ne tenged kayi utew zekelà is kelipey ku.

⁸Su minsan ke pinaagi zutun te surat ku ne neseeng kew, neisip ku he meupiya utew te neveelan ku haazà. Hein aney, nekedsendit a su maan is neveelan ku is nehimu he ingkeseeng niw, iyan, petuluy zà naawà haazà is kegkeseeng niw. ⁹Ne guntaan nelipey ad, kenà tenged te neseeng kew, kekenà, tenged te mibpurungan niw is minge ulaula niw pinaagi zutun te kegkeseeng niw. Ne haazà is kegkeseeng niw, himan te Megbevayà umba inmeupiya niw haazà is surat dey. ¹⁰Su is kegkeseeng he egemiten te Megbevayà, egkehimu he igkehalin te gehinawa te etew su wey melibri sikandin te silut. Ne kenà heini engayan he ibpekedsendit ta, iyan, is kegkeseeng te minge etew he kenà edsundan te Megbevayà, kenà igkehalin te gehinawa zan ne tenged kayi kenà sikandan egkevegayan te untung he wazè din pidtemanàn. ¹¹Iyan, sikiyu, susiya niw is meupiya he nehimu te Megbevayà pinaagi te kegkeseeng niw. Su pinaagi kayi mid-iseg en is kebpurungi niw te ulaula niw. Dekelà diyà te gehinawa niw he metueni te minge etew he wazè dey igkesaway te minge ulaula niw. Utew niw ingkeepes haazà is mid-ulaula zuen te nekesalà. Utew niw ingkehandek haazà su kela ke mekeragkes kew ke edsilutan sikandin te Megbevayà. Ne utew kew zaan mibulung kediey, ne mid-iseg is kedtumana niw te minge sugù ku keniyu. Ne kenà dutun dà taman su segugunè niw midsiluti sikan is etew he mid-ulaula te mezaat. Ne ingkepeehè niw he wazà keniyu he salà dutun te neulaula zin. ¹²Kenà iyan dà impesurati ku keniyu is mehitenged duen te etew he nekesalà wey kes neselaan din, kekenà, ebpeketistigus is Megbevayà he umba mibpesuratan ku sikiyu su wey niw meisipisip ke sengemenu key kemahal diyàn te gehinawa niw. ¹³Ne tenged kayi utew key nelipey.

Ne kenà duen dà taman su nelipey key zaan tenged te nelipey si Tito. Ne iyan ingkelipey ni Tito is: pinaagi te minge ulaula niw he meupiya ne naawà is minge samuk diyà te isip din. ¹⁴Indantal ku sikiyu ziyà te ki Tito ne wazà mebperis is kedentala ku keniyu. Layun tutuu is egkegiyen

dey keniyu ne iring din ded daan, benar is migkagi ku ziyà te ki Tito mehitenged keniyu. ¹⁵Umba ed-iseg kew ebmahal ziyà te gehinawa zin su egketenuzan din is kedtumana niw te minge sugù ku wey is kegkegalew niw kandin asal utew niw zutun ingkelenew kes kebpekeuma zin su nahandek kew ke zuen wazè niw metuman. ¹⁶Ne tenged kayi, utew ad egkelipey su netuenan ku he ebpekepurung ad ebpekesarig keniyu.

Is Kebegey te Tumutuu

8 ¹Egkesuatan dey, minge suled, he metueni niw ke hengkey is nehimu tenged te gagew te Megbevayà diyà te minge tumutuu ziyà te Mesidunya. ²Minsan dutun te nekeantus dan te utew mepait he kemeresayan, ingkelipey zan utew gihapun ne tenged kayi minsan pa te utew zan egkengeayuayu, utew zekelà is ingkevegey zan he tavang te minge zuma zan he tumutuu. ³Ebpeketistigus a he midhimu zan is taman te egkehimu zan, ne subra pa te egkehimu zan is imbegey zan he ebpuun te keputian te atey zan. ⁴Su midhengyuan key zan he tuguti zey sikandan he mekeugup kenami te kebegey te tavang diyà te minge tumutuu ziyà te prubinsya he Hudiya. ⁵Wazè dey peebuta he egkehimu zan is iring dutun. Inhuna zan ivegey is tivuuk he lawa zan wey gehinawa zan diyà te Megbevayà, ne zutun, tenged te edtumanen dan is egkesuatan te Megbevayà, mibpevayàbayè dan daan kenami. ⁶Ne geina te iyan si Tito nemuunà te vaal ziyàn te keniyu te kebpenguwaa te idtavang niw ziyà te minge tumutuu he tigHudiya, midsembagan dey sikandin he ipelaus din en su wey kew zin metevangi te kedhimesaza kayi te ulaula mehitenged te gagew niw. ⁷Netuenan ku he wazà kurang niw te langun he minge ketau wey ulaula he meupiya. Dekelà is kedtuu niw; metau kew he ebpenurù; nesavut niw is tutuu he tuluuwen; ebpetebtevangè kew layun; ne zekelà is gagew niw kenami. Tenged kayi egkesuatan dey he wazè niw zaan kurang kayi te kebpaahaa niw te gagew niw ziyà te minge tumutuu he tigHudiya.

⁸Kenà heini kesuguan ku keniyu, kekenà, ibpesayud ku keniyu is dekelà he gustu te zuma he minge tumutuu te kedtavang te minge zuma zan. Umba ibpesayud ku heini su wey niw meiringi. Ne pinaagi kayi egketuenan ku ke tutuu ve is keniyu he gagew. ⁹Netuenan ta ke hengkey is kezekelà te gagew kenita te Nengazen tew he si Jesu Kristu. Su tenged te hizu zin kenita, minsan te utew sikandin sepian diyà te langit, midhimu zin he utew sikandin ayuayu pinaagi te kebpeetew zin wey kebpehimatey zin. Ne tenged kayi te kegkeayuayu zin egkehimu ki he utew sepian.

¹⁰Iyan sambag ku keniyu is: himesaza niw haazà is kedtiguma niw te selapì he mibpuunan niw zutun te nehuna he tuig. Iyan kew nehuna te kedtigum te selapì wey metevangi is minge tigHudiya, ne kenà duen dà

taman su heini he isip te kedtavang kandan, ne ziyen ebpuun te keniyu. ¹¹Ne tenged kayi peniguduwi niw wey niw mepasad sumalà is egkehimu niw. Kinahanglan he zekelà is gustu niw te kedhimesaza kayi te vaal iring te zekelà is gustu niw hein aney te kebpuuni kayi. ¹²Su emun dekelà is gustu niw te kebegaya te tavang sumalà is egkehimu niw, iyan heini igkesuat te Megbevayà su kenè din ebuyuen kenita is kenè ta igkeveyey, kekenà, iyan ebuyuen din haazà is egkehimu ta he ibegey kandin.

^{13,14}Kenà iyan dini te isip ku is merasey kew su wey metevangi is duma he edlised, kekenà, egkesuatan ku he metevangi niw is menge tumutuu he edlised guntaan geina te sepian kew guntaan. Ne keuzemà, emun iyan kew edlised ne iyan sikandin sepian, egkehimu he edtevangen kew zan daan. Pinaagi kayi ebpeked-iring kew ne wazà edlised he tumutuu. ¹⁵Iring heini te insurat dengan he Lalag te Megbevayà su edhenduen heini te,

“Haazà is etew he nekekuwa te zekelà,
wazà gihapun mesubrahi is nekuwa zin.
Ne haazà is etew he zeisek is nekuwa zin,
wazè din daan kurang.”

Si Tito wey Is Menge Zuma Zin

¹⁶Dekelà is kebpeselemati zey te Megbevayà su imbegey zin ki Tito is dekelà he gustu te kedtavang keniyu iring te kenami zaan he gustu. ¹⁷Ne hein mid-insaan dey sikandin ke egkesuatan din he edtavang keniyu utew sikandin nesuat. Ne kenà duen dà taman su zaan sikandin egkesuat he edtavang keniyu. Ne tenged kayi te suat din ed-isip edlikù diyen te keniyu. ¹⁸Ibpezuma zey kandin is sevaha kayi te menge suled tew he tenged te kedhagù din te kedsengyawa te Meupiya he Tudtulanen, utew sikandin telehuzen te menge tumutuu te langun he menge inged. ¹⁹Ne kenà duen dà taman su nepilì sikandin te menge gurupu te menge tumutuu zini he iyan eduma kenami zutun te kedhated dey kayi te idtavang diyà te egkengeayuayu. Umba iyan key edhated su wey mevantug is Nengazen ne wey zaan metueni he utew key egkesuat he edtavang.

²⁰Umba egkesuatan dey he eduma heini is suled tew su wey key kenà medudahi su kela ke zuen egkagi he ebpenggemiten dey heini is dekelà he selapì he idhated dey. ²¹Su egkesuatan dey he hustu is ebeelan dey sumalà is ked-isipa kenami te Megbevayà ne kenà duen dà taman, kekenà, maahà daan te menge etew he metazeng is menge vaal zey.

²²Ne zuen pa suled tew he ibpezuma zey engki Tito. Mibpurungan ku sikandin susiya ne utew zekelà is gustu zin te edtavang te menge tumutuu, iyan, tuwas pa zekelà is gustu zin te edtavang keniyu geina te zekelà is kedsarig din keniyu. ²³Si Tito, iyan timbang ku te kedhimuwa

ku te kedtavang keniyu. Ne heini is minge suled tew he zezuwa he eduma kandin pehendiyen, minge sugù sikandan te minge gurupu te tumutuu zini. Pinaagi kandan egkevantung layun si Kristu ziyà te minge etew. ²⁴Ipeehè niw kandan is gagew niw su wey metueni te minge tumutuu ziyà te minsan hendei he inged he tutuu iyan is gagew niw te minge zuma niw, ne zutun egketuenan dan he tutuu is migkagi zey he metinevangan kew.

9 ¹Wazà kinahanglan he idsurat ku keniyu ke hengkey is hustu he ed-ul-ulahan niw te kedtavang te minge tumutuu he egkengeayuyau ²su netuenan ku he zekelà is gustu niw te kedtavang. Migkegiyan ku is minge tumutuu he tigMesidunya he layun dekelà is gustu niw te kedtavang. Migkagi ku kandan he puun pa zutun te nehuna he tuig daan naandam is gehinawa niw te minge tigGerisya te kebegey. Ne is kezekelan kandan, hein nezineg dan heini, mid-iseg is gustu zan te kedtavang daan. ³Ne guntaan edsuguen ku ziyen heini is minge suled tew su wey kew zan metevangi te kedtumana te migkagi ku mehitenged keniyu su kela ke mehimu he lalag dà duen ne zutun dà taman. Iyan, netuenan ku he edtumanen niw gihapun ne edtegenahan niw is idtavang niw sumalà is migkagi ku. ⁴Su emun kenè niw edtumanen ne emun eduma kediey pehendiyen is minge tigMesidunya ne egkeehè dan he wazè niw tegehaha is idtavang niw, ne egkeeled key ne egkeeled kew zaan tenged te migkagi ku he naandam kew en. ⁵Ne tenged kayi neisip ku he kinahanglan he ed-insaan ku heini is tetelu he minge suled tew ke egkehimu he edhuna zan kediey pehendiyen su wey kew zan metevangi te kedtegehaha he zaan te idtavang he impenaad niw. Ne zutun egkehimu he egketegane en haazà dutun te kebpekeuma ku ne egketuenan te langun he umba ebegey kew, kenà tenged te ebpegesen kew, kekenà, tenged te ebpuun diyà te keputian te atey niw is kebegey niw.

Is Kegkekelelagan

⁶Kenè niw lipati heini is sempità he emun deisek is ibpemula ta, deisek daan is egkeragun ta, ne emun dekelà is ibpemula ta, dekelà daan is egkeragun ta. ⁷Kinahanglan he ed-isipen te kada sevaha ke hengkey is egkesuatan din he ibegey ne iyan ibegey zin. Kenè ta ibegey is kenè ta egkesuatan he ibegey, ne kenè ta zaan ibegey emun egkeisip ta he integel kenita is kebegaya ta, su emun ebegey ki, kinahanglan he ebpuun te keputian te atey ta is kebegaya ta zutun ne iyan haazà utew egkesuatan te Megbevayà. ⁸Ne egkehimu te Megbevayà he ibegey zin kenita is subra pa zutun te egkinehenglanen ta, su wey ta layun maazen is langun he minge kinahanglan ta wey zuen ta zaan subra he igketavang ta te zuma. ⁹Ne zuen insurat he Lalag te Megbevayà he edhenduen te,
 “Layun dekelà is ibegey te Megbevayà

diyà te egkengeayuayu ne kenà egkelipatan
te wazà pidtemanana is ketulanged din.”

¹⁰Ne is Megbevayà, iyan ebegey te veni diyà te ebpemula su wey zuen egkeenen. *Is idtavang ta te zuma ne iring te ibpemula. Ibegey zin daan kenita is ibpemula, he ke vâ dà egkegiya, is igketavang ta te zuma, su wey zuen dekelà he uzar ta he ebpuun te metazeng he ulaula ta ziyà te zuma.*

¹¹Su edhimuwen din layun he kenè ki maalang-alang te selapi su wey ta mevegayi is edlised. Ne umba, menge suled, mezakel is ebpeselamat te Megbevayà tenged te tavang he ibpeuwit niw kenami. ¹²Ne heini is ibegey niw, kenà iyan dà pulus din is kegketavangi te menge tumutuu te Megbevayà, kekenà, pinaagi kayi utew mezakel he etew is ebpeselamat te Megbevayà. ¹³Ne emun egketuenan te menge etew he utew kew metulanged, ebentugen dan is Megbevayà tenged te kedtumana niw te menge sugù din wey tenged te mezesen he kedtuu niw te Meupiya he Tudtulanen su midtevangan niw sikandan ne midtevangan niw zaan is duma. ¹⁴Ne zutun id-ampù kew zan, ne egkehimu he utew kew mahal ziyà te gehinawa zan tenged te zekelà he gagew niw kandan he imbegey keniyu te Megbevayà. ¹⁵Ne tenged kayi ebpeelematan ta is Megbevayà tenged te kebegaya zin kenita te Anak din he wazà minsan hengkey he ebpekerepeng te kemahal zin.

Is Ketezengan ni Pablo Mehitenged te Ketengdanan Din

10 ¹Duen egkagi he siak, si Pablo, telawen a emun diyan a te keniyu, iyan, memegarang kun is menge lalag ku keniyu emun edlelagan ku sikiyu pinaagi te surat. Iyan, guntaan, kenà megarang is menge lalag ku, kekenà, edhangyù a keniyu pinaagi te menayù he menge lalag iring te menayù wey veligegawen si Kristu. ²Idhangyù ku keniyu he purungi niw is ulaula niw su wey kenà kinahanglan he mebmegarang is menge lalag ku emun diyan a te keniyu. Duen duma keniyu he egkagi he iring a te etew zà duen *he kenà dekelà diyà te gehinawa zin is egkesuatan te Megbevayà. Ne hanu man su kayi te kedhendiyana ku te keniyu emun kenè dan ebpurangan is menge ulaula zan, ne egkeehè dan ke sengemenu kegarang is menge lalag ku.* ³Tutuu iyan he etew key zà duen, iyan, is paagi te kedsukuli zey te mezaat, ne kenà ebpuun te isip te etew zà duen. ⁴Su is menge ketezengan, he ke vâ dà gumaan, he idsukul zey te mezaat, ne kenà ebpuun te etew, kekenà, mekegegehem utew su ziyà ebpuun te Megbevayà. Ne heini is menge ketezengan, kenà egkesukulan te minsan hengkey he tarù he ketezengan he igkuntada te Megbevayà minsan ke utew melig-en. ⁵Ne iyan heini egemiten dey te kedeega te menge tarù he ketezengan te menge mepedeligen he etew he kenà egkesuat he edtuu te ibpesavut te Megbevayà. Ne minsan is ked-isipa zan te tarù, egkehimu he ed-ilisan dey su wey zan human meisip is tutuu ne pinaagi kayi

ebpemingegen dan is minge sugù ni Kristu. ⁶Ne emun ibpeehè niw en he metinumanen kew te minge sugù ni Kristu, ne zutun edsilutan dey is minsan hentei pa he tumutuu ziyàn he kenè pa egkesuat he ebpemingeg te minge sugù din.

⁷Purungi niw isipa is nesavut niw en su zuen minge zuma niw he kunaan dan ke iyan dan dà minge hustu he suluguen ni Kristu. Kinahanglan he mesavut dan he sikami, hustu key zaan he minge suluguen ni Kristu. ⁸Kenè en buwa kinahanglan he egkegiyen ku keniyu he zuen kebakayabayà ku keniyu he imbegey kedì te Megbevayà. Iyan, ke henduen be te utew subra is idantal ku, kenè ku igkeeled heini su wazè din iyan ivegaya kayi te kebakayabayà dini te kediey su wey ku mezezeeti is kedtuu niw, kekenà, imbegey zin kediey su wey ku melig-eni is kedtuu niw. ⁹Kenè ku egkesuatan he ibpelihandek ku keniyu is minge surat ku, ¹⁰iyàn, duen egkagi he siak si Pablo, utew a mevurut he edawey keniyu emun ebpekidlalag a keniyu pinaagi te surat, iyan, emun diyan a te keniyu, telawen e kun ne kenè e kun metau he egkagi. ¹¹Is etew he egkagi te iring kayi, kinahanglan he sevuta zin he is egkegiyen dey pinaagi te surat emun kenè key ziyàn te keniyu, ne iyan ded ed-ul-ulahan dey emun ebpekeuma key ziyàn.

¹²Telawen key iyan te ked-iring te minge ulaula te minge zuma he etew ziyàn he minge mepedeligen. Kunaan dan ke iyan sikandan metau egkagi ke hengkey is meupiya he ulaula. Uteu zan tulebung! Su emun ed-iringan te minge etew is kandan he ulaula egkegiyen dan he utew meupiya. Iyan, ke kenà sikandan ed-iringan te minge etew egkegiyen dan he sayep haazà is kenà ed-iring. ¹³Ne sikami, kenà subra is kedantal zey su iyan dey zà idantal haazà is nehimu zey te edtuman he insugù kenami te Megbevayà. Ne ragkes kayi is minge vaal zey hein diyan key te keniyu. ¹⁴Kenà egkehimu he subra is kegemita zey te kegehèm dey emun edsembagan dey sikiyu. Kenè dey sikiyu pezem egkeveyveyaan ke wazè dey sikiyu mepenuudtuli zengan, iyan, iyan key nehuna he nekeuma ziyàn he ebpenuudtul te Meupiya he Tudtulanen mehitenged ki Kristu. ¹⁵Kenè dey idantal is minge vaal te zuma he etew ziyà te minge inged he zutun wazè key sugua te Megbevayà. Iyan, geina te neragkes kew kayi te mibpeveelan kenami te Megbevayà, egkesuatan dey he emun ed-iseg en is kedtuu niw ne edtevangan key keniyu zutun te minge vaal zey ziyàn te inged niw. ¹⁶Ne pinaagi kayi egkehimu he idsangyew zey is Meupiya he Tudtulanen ziyà te minge meziyù he inged he ziyàn dapit te keniyu. Su kenè dey egkesuatan he idantal zey is mibeelan te zuma he etew zutun te minge inged he wazè key zutun sugua te Megbevayà.

¹⁷Duen insurat he Lalag te Megbevayà he edhenduen te, “Ke zuen etew he egkesuat he edantal, kinahanglan he iyan dà idantal zin is nengehimu te Nengazen.” ¹⁸Su emun edeligen ta is kenita he minge vaal, kenà

heini egkesuatan te Megbevayà, iyan, emun duen igkezeligi kenita te Megbevayà iyan heini egkesuatan te Megbevayà.

Si Pablo wey Sikan is Uvag Menge Epustul

11 ¹Pekelalaglalag kew he entusa niw is egkegiyen ku keniyu minsan ke henduen be te tulebung a. ²Su insavuk te Megbevayà kayi te kediey is dekelà he suat he kenè kew medsuwey te Nengazen. Iring kew te raga he nekegunan, iyan, iyan si Kristu ingkagun ku keniyu. Ne egkesuatan ku he wazà duma he ebpekeesawa keniyu. ³Egkeipeng a keniyu su kela ke meengkezi niw is kebpurungi niw kedtumana te menge sugù ni Kristu su kela ke mesahug is kedtuu niw te selakew he edtuuwen. Kela ke meiringi niw si Ibà dengan su mid-akalan sikandin te teruen he uled he iyan si Setanas. ⁴Umba egkeipeng a su ke zuen ebpekeuma ziyàn he selakew is ibpesavut dan mehitenged ki Jesus, ne selakew is mulinulin he ibpenurù dan, ne kenè dan iyan ibpesavut is tutuu he tuluuwen he impesavut dey, kekenà, selakew is ibpenurù dan, ne ed-entusen niw mulà is kandan he kebpenerù ne kenà duen dà taman su utew niw egkesuati te ebpeminèg.

⁵Ne heini is menge uvag kun lavew he epustul ni Kristu, kunaan dan ke utew zan lavew, iyan, netuenan ku he wazè e zan melewawi ⁶su minsan ke kenà a metau he egkagi netuenan ku mulà ke hengkey is tutuu he tuluuwen. Ne iyan heini impesavut dey keniyu zengan te minsan keenu he timpu wey te minsan hengkey he paagi.

⁷Hein impesavut ku ziyàn te keniyu is Meupiya he Tudtulanen, wazà a mebpsuhul keniyu te minsan sengesintabus dà. Ne iyan benar is: mibpekeminus ku en is pid-etawan ku su wey ku sikiyu ikepelavew. Sayep ku ve heeyan? ⁸Dutun te kebpenerua ku keniyu ne iyan midsuhul kedì is menge tumutuu ziyà te zuma pa he menge inged. Henduen be te midtekawan ku sikandan wey ku sikiyu iyan metevangi. ⁹Ne hein diyan a te keniyu ke zuen kinahanglan ku he selapì, wazè ku vuyua ziyàn te keniyu su is menge suled tew he ebpuun diyà te prubinsya he Mesidunya, imbegey zan kedì is minsan hengkey he egkinehnglanen ku. Sikiyu is tigGerisya, wazè ku pa sikiyu vuyui te igkeuyag ku, ne kenà daan egkehimu he ebuyù a ziyàn te keniyu te minsan keenu he timpu. ¹⁰Ne heini is idantal ku, kenà egkehimu he egkehalin te minsan keenu he timpu su kenà a edawat te selapì te minsan hentei he ziyàn te tivuuk he prubinsya he Gerisya. Tutuu heini iring te netuenan ku he tutuu is impesavut ni Kristu. ¹¹Kunaan niw vuwa ke umba egkegiyen ku he kenà a ebuyù diyan te keniyu su wazà gehinawa ku keniyu, iyan, utew kew mahal zini te gehinawa ku. Netuenan te Megbevayà he mahal kew zini te gehinawa ku.

¹²Kenè ku edlekaan heini is lalag ku he kenè ku ebuyù diyan su wey haazà is menge uvag kun lavew he epustul ni Kristu, kenè dan mekekagi

he iring te kenami is minge paagi zan te kebaal. ¹³Kenà sikandan tutuu he minge epustul ni Kristu, kekenà, tarù sikandan he minge suluguen ni Kristu. Edterteruan kew zan pinaagi te minge vaal zan ne egkegiyen dan he tutuu sikandan he minge epustul ni Kristu. ¹⁴Ne kenè ku heini igkeinuinu su minsan si Setanas, egkehimu zin is dagwey zin he iring te utew merayag he velinsuguen te Megbevayà he ebpuun te langit. ¹⁵Umba, kenè ki egkeinuinu ke egkehimu zaan is minge suluguen ni Setanas he iring te minge metazeng he suluguen te Megbevayà. Iyan, keuzemà edsilutan sikandan sumalà is minge mezaat he vaal zan.

Is Ked-antus ni Pablo

¹⁶Edsublien ku te egkagi he kinahanglan he kenà isipa te minsan hentei keniyu he tulebung a tenged te minge lalag ku keniyu. Iyan, minsan ke ed-isipen niw he tulebung a, entusa niw te ebpemineg su wey a mekezantal te kenà utew egkeuget. ¹⁷Heini is egkegiyen ku keniyu, ne kenà iyan ibpekagi kedì te Nengazen, su iring a te tulebung is edantal. ¹⁸Ne geina te zuen mezakel he idantal zan is minge ulaula zan dini te kelibutan egkehimu vuwa taman te megaan dà ke idantal ku zaan is kedì. ¹⁹Ne geina te minge uluwanen kew he etew, utew kew metau he ed-antus te minge lalag te tulebung diyà te keniyu. ²⁰Su ke zuen minsan hentei he ebmandarmandar keniyu wey ke zuen ed-agew te minge azen niw wey ke zuen edlimbung keniyu wey ke edlupigen kew zan wey ke ebugelen kew zan ne ed-entusen niw. ²¹Uteu zan mevurut, iyan, sikami, telawen key ne egkeeled a su haazà is minge ulaula zan keniyu he kunaan niw ke utew meupiya, wazè dey meulaula ziyen te keniyu. Ne geina te wazè dan en kegkehandek te edantal ne kenà a zaan egkehandek he edantal minsan ke ebpekeiring a te tulebung. ²²Haazà he minge etew, egkegiyen dan he minge pinilì sikandan te Megbevayà su minge Hudiyu zan, minge kevuwazan ni Israyil wey minge kevuwazan te kepuun ni Israyil he si Abraham. Ne siak daan, Hudiyu a he kevuwazan daan ni Israyil wey ni Abraham. ²³Netuenan ku he henduen a te ebunegen kayi te minge lalag ku, iyan, kenà egkesabpeng is bèbè ku kayi te egkegiyen ku. Egkegiyen dan he minge suluguen sikandan ni Kristu. Siak, lavew e pa he metinumanen he suluguen ni Kristu. Uteu memeregen is ebpeveelan din kediey. Lelayun ad egkepirisu ne sikandan, kenà layun. Lelayun ad ebugela te minge etew he kuntada te Megbevayà, kenà te sikandan. Mezakel en is nengeegiyan ku he edhimetayan a pezem, kenà te sikandan. ²⁴Kelelima e en bugela te minge Hudiyu te minge ketluan wey siyew he lagkut. ²⁵Ketetelu ad bugela pinaagi te minge tuked. Midtuleng a te watu te minge etew su edhimetayan e zan pezem. Ketetelu en daan melavu is barku he mid-untuzan ku ne zuen timpu he sengekezukileman wey sengeandew ziyà a te lawed te zagat is nekegegentungan dà. ²⁶Ne

zutun te minge kedhipanew ku ne nengeegiyan ku is mezakel he minge kemeregenan tenged te kedalem te wahig, wey tenged te minge tulisan, wey tenged te minge kuntada ku he minge zuma ku he Hudiyu wey minge kenà Hudiyu. Mezakel is minge hitavù kediey ziyà te minge inged wey ziyà te wazà meginged wey ziyà te zagat wey pinaagi te minge tarù he tumutuu. ²⁷Midhagù a is edterebahu; layun a egkepurang; layun a egkevital; ne layun a egkemezahi. Layun a kurang te egkeenen wey layun a egkealang-alang te egkeubpaan wey ugelingen. ²⁸Ne kenà duen dà taman su andew-andew egkeregenan a te kedumelaha ku te langun he minge gurupu te minge tumutuu ziyà te minsan hendei. ²⁹Su ke zuen tumutuu he edlised su ebmeguyà is kedtuu zin, ne edlised a zaan su egkeipeng a kandin. Ke zuen nepenulayan ne nekesalà, ne haazà is etew he nekepenuley kandin, utew ku igkeepes.

³⁰Kenè ku egkesuatan he edantal a, iyan, emun kinahanglan he ibpezantal a, idantal ku is minge kemeresayan he nengeegiyan ku su pinaagi kayi egketueanan niw he zekelà is kurang ku te ketau. ³¹Is Megbevayà wey Amey te Nengazen tew he si Jesus, deliga sikandin te wazà pidtemanana. Netueanan din he kenà tarù heini is egkegiyen ku. ³²Dengan, hein diyà a te inged he Demasku, is gubirnedur he intezù ni Hadì Eritas, midsugù din is minge sundaru he ventayi zan is pultahan he idselang dutun te kutà te inged su wey e zan mezakep ke egawas a zutun. ³³Iyan, duen minge etew he midtavang kediey ne in-ahuk e zan te zekelà he vinevey ne midhelugan e zan diyà te sulawà he liyu te metikang he elavat he kutà dutun te inged ne nekegawas a zutun.

Is Impezayag te Megbevayà Diyà te ki Pablo

12 ¹Minsan pa te wazà pulus te kedantal ku, edantal e zed gihapun. Ne guntaan egkegiyen ku keniyu is impezayag wey is impaahà kedè te Nengazen. ²Dengan, duen tumutuu he nekilala ku he mibpengelinteuwan he mekepenumbaley sikandin diyà te utew metikang he langit he ed-ubpaan te Megbevayà. Sepulù en wey heepat he tuig heini is kegkehitalvù kayi. Wazè ku metueni ke nekehendiyè be is lawa zin wey ke impeehè dè be heini kandin te Megbevayà pinaagi te tegeinep; iyan dà nesayud kayi is Megbevayà. ³Iyan dà netueanan ku is: diyà sikandin mekseled te utew mekempet he inged te Megbevayà ne edsublien ku te egkagi he wazè ku metueni ke nekehendiyè be is lawa zin wey ke impeehè dà heini kandin te Megbevayà pinaagi te tegeinep; iyan dà nesayud is Megbevayà. ⁴Ne zutun te kebpenumbaley zin diyà te langit duen nezineg din he kenà egkekagi pinaagi te kelibutanen he lalag ne kenà daan idtugut he egkegiyen te etew zà duen. ⁵Ne egkehimu he idantal ku heini is nehitavù kandin, iyan, kenè ku iyan idantal is minge ketau ku, kekenà, iyan ku idantal haazà is ebpekepaahà te kurang ku te

ketau. ⁶Ne penenglitlan ke egkesuatan ku he edantal a, kenà egkehimu he egkegiyen niw he wazà pulus te zantal ku su tutuu is idantal ku, iyan, kenà a edantal su kenè ku egkesuatan he isipa a te menge etew he utew lavew. Meupiya ke zutun dà ebpuun is ked-isipa zan kedì te menge ulaula ku he neehè dan wey menge penurù ku he nezineg dan.

⁷Mibegayan a te Megbevayà te utew merasey he zaru su wey ku kenà ikezantal is utew meupiya he nengeehè ku ziyà te langit. Ne heini is daru, ne egemiten ni Setanas he idrasey kedì, ne pinaagi kayi kenà a ebpekepelavew. ⁸Ketetelu ku en iampù diyà te Megbevayà he iawè din, ⁹iyen, iyan tavak din kediey is, “Edtevanglan ku sikew wey nu maantus ne hustu en. Su zekelà is egkehimu te gehem ku ziyen te kenikew emun wazè nu en egkehimu,” ke sikandin. Ne tenged kayi utew ku egkesuati he idantal ku is kurang ku te ketau su wey a melig-eni te gehem ni Kristu. ¹⁰Ne meupiya en utew te gehinawa ku is kurang ku te ketau, is kedsumpulita wey is pesipala kediey te menge etew, wey is menge kemeregenan wey is kemeresayan tenged te kedtuu ku ki Kristu. Su netuenan ku he emun wazè en kediey he ketau, dekelà is ibegey kediey ni Kristu he ketau.

Is Ingkesemuki ni Pablo te Menge Tumutuu

¹¹Henduen a te tulebung he etew su edantal a, iyan, netegel a keniyu su iyan kew pezem ebegey te menge ketezengan ku he idtavak keniyen te menge uvag kun epustul ni Kristu. Ne minsan pa te wazà kediey he ketau wazà a gihapun melewawi kayi te uvag menge utew lavew he kenà tutuu he epustul ni Kristu. ¹²Ne hein diyen a te keniyu impeehè ku keniyu he tutuu a he epustul ni Kristu su minsan neregenan a, mid-antus a su wey ku ikepaahà is menge singyal wey menge egkengein-inuwan he iyan tuus te tutuu he epustul. ¹³Is kedtavang ku keniyu ne iring ded te kedtavang ku te menge tumutuu ziyà te zuma he menge inged. Asal kela ke kunaan niw ke kenè ku idtavang keniyu is kenè ku keniyu kebuyui te selapì. Emun nekesalà a keniyu pinaagi kayi peseyluwa a keniyu.

¹⁴Ed-endaman ku en is kedhendiyen ku ne iketelu en heini is kebpenumbaley ku ziyen te keniyu. Ne iring ded te nehuna, kenà egkehimu he ebuyu a keniyu te selapì. Kenè ku egkesuatan is selapì niw, kekenà, egkesuatan ku he mahala a keniyu ziyà te gehinawa niw. Nehimu a he amey niw su pinaagi kedì neketuu kew te Megbevayà. Ne kenà egkehimu he ebuyuan is menge vatà te amey zan, kekenà, iyan ebuyu is menge vatà. ¹⁵Egkelipey a utew ke igkevegey ku is menge azen ku wey is desen ku wey ku sikiyu metevangi. Iyan, minsan pa te mahal kew zini te gehinawa ku henduen be te kenà a mulà mahal ziyen te gehinawa niw.

¹⁶Duen duma keniyu he ke sikandan te, “Tutuu iyan he wazà si Pablo mebuyu te selapì, iyan, duen paagi zin he meeles wey kiw zin

melimbungi.” ¹⁷Ne emun iyan heeyan egkeisip niw, ipetueni niw kedì ke hengkey he paagi is kekgelimbungi ku keniyu. Duen be nekuwa ku zutun te kedsugua ku te minge zuma ku zian te keniyu? Nelimbungan kew zan be? ¹⁸Midhengyuan ku si Tito he medhendiyen te keniyu, ne impezuma ku zaan kandin is sevaha he minge suled tew. Midlimbungan kew zan be? Wazè niw egkekagi he iring kayi, su si Tito wey siak ne neked-iring is paagi zey wey ed-ul-ulahan dey su pudu memetazeng.

¹⁹Kunaan niw vuwa ke pinaagi kayi te egkegiyen ku ibpesavut ku keniyu he wazè dey minge sayep, iyan, kenà iyan heeyan tuyù ku. Su ebpeketistigus is Megbevayà he heini is migkagi ku keniyu, ne iyan hustu he egkegiyen tenged te kebpekidsevaha ku ki Kristu. Ne, minahal ku he minge suled, insurat ku heini is langun, su wey meheget is kedtuu niw. ²⁰Egkesamak is gehinawa ku su kela ke zutun te kebpekeuma ku zian ne iyan ku egkeahà diyan te keniyu is minge ulaula he kenè ku egkesuatan. Ne emun iyan haazà ne zuen ed-ul-ulahan ku zutun he kenè niw zaan egkesuatan su kinahanglan he edsewayen ku is keniyu he ulaula. Su kela ke zuen ebpekigkuntada zian te minge zuma zin, kela ke zuen egkesina, duen petuluy egkepauk, wey legezen, kela ke zuen diyan ebpenemperasà wey edsulà te zuma zin, kela ke zuen bereituk. Kela ke zuen diyan te keniyu gelbuwen, wey kela ke wazè niw kebpekid-uyun te minge tumutuu. ²¹Egkesemukan a su kela ke zutun te kebpekeuma ku zian ne igkeeled ku sikiyu ziyà te Megbevayà ne kela ke utew a egkeseeng tenged te mezakel he netuenan ku zengan he nekevaal te mezaat ne wazè dan pa engkezi is minge mahawag he ulaula zan iring te kedhilavet te kenè dan esawa wey is kedtumana zan te mezaat he kebayè dan.

Menge Telaan ni Pablo

13 ¹Iketelu en heini te kebpenumbaley ku zian. Ke zuen etew he ebpehusey kedì ne zuen idsumbunga zin te zuma zin he tumutuu, kinahanglan he ebentayan ta is sugù diyà te insurat he Lalag te Megbevayà he edhenduen te, “Ke zuen idsumbunga niw te zuma niw kinahanglan he edtistigusan te minge tetelu ne emun kenà ne minge zezuwa he etew.” ²Dutun te ikezuwa he kebpenumbelayi ku keniyu, sikiyu is memezaat is ulaula zengan, migkagi ku keniyu he emun kenè niw ed-engkezan haazà is memezaat he ulaula niw ne edsilutan ku sikiyu emun ebpekeli kù a. Ne ed-umanan ku egkegiya guntaan diyan te keniyu wey ziyà te minsan hentei pa he ed-ulaula te mezaat. Ke ebpekeuma a, wazà minsan hentei he ed-ulaula te mezaat he ebpekelikey te kedsiluti ku kandin. ³Dutun, ne egkevenaran kew human he is egkegiyen ku keniyu, iyan is impekagi kediey ni Kristu. Ne kenà sikandin telawen, kekenà, emun duen ed-ul-ulahan din keniyu dekelà is gehem din he ibpeehè din keniyu. ⁴Su minsan ke henduen be te wazà egkehimu ni Kristu zutun te

kedrensanga kandin diyà te krus, nevanhew zed sikandin ne zuen din en begu en he untung pinaagi te gehem te Megbevayà. Ne sikami zaan, henduen be te wazè dey egkehimu su layun key zaan ebpekeantus te kemeresayan, iyan, pinaagi te gehem te Megbevayà he edtavang kenami, duen dey zaan begu en he untung ne ebpeketavang key pa keniyu.

⁵Susiya niw is gehinawa niw wey niw metueni ke tutuu ve is kedtuu niw ki Kristu. Wazè niw ve metueni he midlumunan kew ni Kristu? Ne emun wazà, ne tarù is kedtuu niw ne wazè kew mezawat ni Kristu. ⁶Egkesuatan ku he metueni niw he tutuu key iyan he minge epustul ni Kristu. ⁷Id-ampù dey ziyà te Megbevayà he wazà ulaula niw he mezaat. Ne kenè dey iyan id-empua keniyu su wey metueni te minge etew he edtumanen niw is impenurù dey keniyu su maambe ke kenè niw ed-isipen he epustul key ni Kristu, asal, ed-ul-ulahan niw is hustu. ⁸Su emun hustu is ed-ul-ulahan niw, sikami is epustul, kenà egkehimu he ibpeehè dey is kegehèm dey keniyu su wey zey zà ibpaahà is kegehèm dey ke edsupaken niw is hustu he ulaula. ⁹Egkelipey ad emun wazè niw supak, minsan ke henduen te wazè dey kegehèm. Ne kenà duen dà taman su id-ampù dey he mepurung meheget is ked-ul-ulaha niw te hustu. ¹⁰Umba ebpesuratan ku sikiyu te zini e pa te meziyù su ke ebpekeuma a ziyàn kenè en kinahanglan he megamit ku is kegehèm ku te epustul te kedsilut. Imbegey kedì te Megbevayà heini is kegehèm. Kenà iyan imbegaya zin kayi te kegehèm su wey maawà is upakat niw te tumutuu, kekenà, wey meheget is upakat niw.

Is Kebpengemusta

¹¹Menge suled, iyan dà heini minge lalag ku keniyu; berakat he mebmelipayen kew. Purungi niw is minge ulaula niw; tumana niw is minge sambag ku keniyu. Kinahanglan he mesevaha is gehinawa niw ne mebmelinawen is ked-ubpè niw. Su emun ebeelan niw heini, is Megbevayà he iyan puunà te gagew wey kelinew, layun eduma keniyu.

¹²Mebpelimlimuey kew he iyan tuus he teltelesuled kew tenged te kedtuu niw. ¹³Ebpengemusta keniyu is langun he minge tumutuu te Megbevayà dini.

¹⁴Berakat he ikegagew kew te Nengazen tew he si Jesu Kristu wey verakat he ipeehè keniyu te Megbevayà he mahal kew ziyà te gehinawa zin wey verakat daan he meheget is upakat niw te Wagas he Mulin-ulin. Iyan a si Pablo.